



DEO OPTIMO MAX. UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICO-CHIRURGICA*,
QUOD LIBETARIIS DISPUTATIONIBUS
*manè discutienda, in Scholis Medicorum, die Jovis decimâ-quintâ
mensis Februarii, anno Domini M. DCC. LXXVI.*

M. FRANCISCO-FELICITATE COCHU,
Doctore Medico, Præside.

*An qui Tumores deleri debent, Ferro potius, quàm Cauterio
potentiali, delendi?*

I.

ROTUBERANT passim in corpore humano Tumores, mole, figurâ, colore, duritie, cæterisque adjunctis adeò dissimiles, ut, licet ad genus aliquod possint ut plurimum revocari, de specierum numero nondum fatis constet. Inter eos, complures universalibus modò, modò particularibus remediis, sæpè utrisque, vel ad suppurationem, vel ad resolutionem feliciter perducuntur. Quæ si frustra tentata fuerint, superest, crudele quidem, at non semper rejiciendum præsidium. Ex ipso enim amaritudinis fonte surgit aliquid grati, sanitas nempe, quo dolores possint abundè simul & jucundè pensari. Consistit illud opus in Tumore auferendo, quod instrumento multiplici confici potest. Vel enim funiculis religatus Tumor, aut inermibus digitis prehensus convellitur: vel laqueo paulatim, ab imis radicibus, sic strangulatur, ut spontè post paucos dies decidat. Leniter etiam contorqueri potest ope forcipis, aut ignito ferro comburi. Duo sunt tandem vulgarioris usus, Cauterium, quod aiunt, *Potentiale*, & Cultellus, quorum primo Tumores sensim consumuntur, altero, statim rescinduntur. In iis interim abolendis sunt multa, ad quæ nisi sedulò advertatur, opera erit, si non semper exitiosa, saltem aut difficilis, aut parùm fructuosa. Primò igitur quæ tolli debent ea tantummodò, at omninò tamen, tollantur. Cutis, quantum res sinit, post factam operationem, integra remaneat. Arteria aut vena insignis, si qua vel incautè, vel necessariò aperta fuerit, conspectum non fugiat. Tendones, nervi, membranæ ne molestè quoquomodo afficiantur. Quàm brevissimè fieri potest, pars affecta doleat. Ex Cauterio autem & Ferro, alteri præferri debet alterum quod supra memorata valet præferre.

* Auctore M. Michæle-Philippo BOUVART, 1778.



CUINAM usus tot, inter operandum, astutia si quis scitetur, in promptu responsio est. Plurima, nempe, simul ex iis exurgere commoda, & arceri pericula. Enimvero si Tumor sic auferatur, ut nihil ex eo superfit, quod recidivæ metum incutiat, aut quoquomodo sit nociturum: nec interea cæterarum partium ulla lædatur quæ servari debent, feliciorum curationem consequuturam esse satis elucescit. Deinde cutem non deleri parvi non est. Hoc pacto potest, intra paucos dies, cum fundo vulneris coalescere. Illud si præstari possit, præcavetur suppuratio, quæ, si nimis copiosa fuerit, debilitatem summam affert, imò lethalem sæpè *marasum*, si suppressa, febrem & inflammationem, si moderata & laudabilis, tardam curationem. Non est tamen diffitendum adeò opportunam quandòque esse suppurationem, ut sæpè, absque noxa, prohiberi non possit. At nobis satis erit, si, nonnullis in casibus, utiliter prævertatur. His etiam addendum videtur cutem, cujus usus ignotus nemini, ubi semel scibata fuerit, arte nullâ posse reparari. Num itaque rem levissimi momenti crederes, quòd, ipsâ deperditâ, cicatrice, in plurimos menses protractâ, veluti precariò, vulnus obducatur? Præterea unum tantum contingere potest, ut reverâ non semel contigerit, arteriæ alicui, scilicet, aut venæ insigni inflicto fuisse vulnus. Huic calamitati, promptâ ligaturâ, succurrendum. Sed quam arte præsens adhibebitur auxilium, nisi instrumenti, inter operandum, delectu, cautum fuerit quominus apertum vas, intra circumfusas carnes, citâ contractione, delitescat. Quòd tendones & nervos spectat, nemo nescit eos sensu exquisitissimo esse donatos, ob eamque rationem faciliè admodum irritari. Levi de causâ dolorificè convelluntur, unde oriuntur tensio maxima, durities, longè circa partem affectam, quandòque abscessus periculosissimi, nisi citius delirio, convulsionibus, imò ipsâ gangrænâ supervenientibus, mors accita fuerit. Longioribus tandem doloribus hominem torquere inhumanum est, quem brevioribus sanare possis. Quæ ratio, si cuiquam non ardeat, febrem, vigiliam, virium lapsum, solitas longiorum dolorum comites, consideret.

PLURES sunt Tumorum species, quàm ut singulas possimus describere illud tantum monemus, de Tumoribus omnibus hic non agi. Permulti siquidem observantur à quibus non temperare manus nefandum esset, veluti quandò aut nervis, aut tendonibus hærent, aut vasis majoribus, quarum partium summi discriminis foret vulneratio. Nec etiam deleri debent qui, longâ morâ, maximam in molem creverunt, nisi fortè tenui pediculo, quod rarò tamen occurrit, pendeant. Sunt è contra quos parùm sapienter intactos relinquentes. Tales sunt qui pondere nimio, situ inopportuno, partem aliquam valdè gravant, sicque organi alicujus ad vitam necessarii functionem interceptiunt. Non magis ignoscendum est iis, à quibus timeri potest, ne, lapsu temporis, in immensum augeantur, aut, pejorem induendo naturam, in ulcus mortiferum desinant. Ex hæc prosapia, instar omnium sunt *Scirrhus*, *Cancer*, & præterea Tumores nonnulli, qui, ratione materie quam continent, diversa sortiuntur nomina. Si ea nempe mel referat, *Melicerides*, *Atheromata* si pulticulam, si sebaceum quid ant adiposum filamentis membranisque intertextum, *Steatomata* nuncupantur. Hæc solâ ratione differunt. At illud inter se commune habent, quòd singulorum materia, plerumque sacculo comprehendatur; qui sacculus nihil videtur esse quàm folliculus adiposus, præter naturam, valdè ampliatus. Hujusmodi verò sacculi quandòque sic indurantur, ut æmulentur corium duritiæ. *Scirrhus* est Tumor inæqualis, durus, renitens, indolens, per sæpè in glandulis, prægressâ plerumque inflammatione, nascens. Consistit autem in congerie quâdam abnormi atque intricatissimâ vasorum induratum, quæ, lymphâ inspissatâ, maximam partem, obturantur. Facile in Cancrum potest migrare, cum, pressione jugi, succis concretescentibus, vas-

culorum cavum omnino oppletur. Tunc circuitus sanguinis ibi penitus deficit, magis ac magis indurantur vasa, crescit tumor atque exporrigitur in radices quæ ad corneam duritiem assurgunt. Pruritus sentitur molestus, dolorificus. Tandem res habet, quandiu non ulceratus est Cancer. Sed concretus humor tandem expanditur. Quæcumque autem de causâ, vehementiori fortè sanguinis impulsu, calorem concipiat, turgescit in parte affectâ tantò majore æstu, quantò violentius compactus fuerit.* Tunc non simplex dolor urget, sed cruciatus intolerabilis, quasi tractus ignei. Cutis succo rarefcente pressa nigrescit, corripiturque gangrænâ ac tandem rum-pitur. Hiat ulcus fædum, marginibus extrorsum versis, sanie tenui, erodente stillans, aspectu horrendum, immedicabile. Cancrî eò usque progressi curatio non debet sus-cipi, at solummodo cum, primis initiis, sub cute adhuc integrâ, ad digitorum nu-tum fluctuat, necdum, in partes subjacentes, altas radices egit. Tunc potest deleri ficat & Tumores præmemorati, quibus etiam possunt addi Ficus, Fungus, Polypus aliique quàmplurimi. Sed quæcumque in Tumorum ablatione commendavimus, ea maximè Cultello præstari certum est, contraria verò Cauterio inveni.

* Do. Astruc
de morb. Ven.
necr.

I V.

QUID enim Cultello chirurgico tutius aut commodius? Cauterio quid magis in-opportunum intutumve? Cultello, si præsertim manu prudentiæ non experte gubernetur, non aliæ cæduntur partes, quàm quæ cædi debent, omnes verò possunt excidi, quæ sunt excidendæ. Cauterio non item. Velenim sub pulveris formâ, in-spergitur, vel apponitur unguento mixtum, vel aquoso aliquo vehiculo dilutum. Quoquo autem modo usurpetur, ut ut dextrè id fiat, præcaveri nunquàm potest, quin hanc vel illam partem, aut acutis, aut moderatius comburatur, prout molliorem invenerit aut solidiorem. Hinc quoque, vel inde divagari potest, eaque rodere quæ integra manere debuissent, intacta verò relinquere quæ forent consumenda. Sunt etiam nonnullæ Tumorum partes, quarum ne vel minimam turpescere multum interest, facculos puta occallatos, vel ipsas Cancrorum radices. In eas, quoniam nullum ferè habent cum sanguinis circuitu commercium, irrita planè est vis Cauterii. Vossellâ è contra, vel digitis prehensâ, Cultelli operâ, levi prorsus negotio, separantur. Deinde præcaveri nunquàm potest, quin Cauterio penitus destruatutur cutis, at Scal-pello facillè servari potest, siquidem cruciatim, aut quovis alio modo inciditur, ex-tremis digitis postea separantur anguli, vulneris fundo, post sublatum Tumorem, si visum fuerit, aptandi. Tertiò si vel ob nimiam in operando celeritatem, imperi-tiam, vel *anomaliam* vasorum, quam vaticinari fas non est, distributionem, arteria aut vena non spernendæ magnitudinis aperta fuerit, illicò, nihilo obstante, ligari potest. Scalpello enim incisa, statim apparet, nec ante crispatur quàm possit filo confringi, imò, sanguine ubertim erumpente, statim ipsa se prodit. At multò len-tius cum Cauterio proceditur, quod, ut possit agere, per tempus aliquod sinendum est. Interea si quod vas erosum fuerit, molestè vellicatum, in carnes morâ non me-diocriter juvante, reconditur. Ferro tandem (modò cæsim, non vero punctum id fiat) multò minore periculo, quàm Cautico, tendones, nervi, membranæ vul-nerantur, quæ tutò, & quandòque data operâ omnino resceantur. Ex Cautici au-tem molesto & dolorifico morsu funestissima, qualia jam diximus, cientur symp-tomata.

V.

EX eo quòd læsa Cautico arteria statim stringatur, atque retrahatur in carnes, verum est cohiberi sanguinem, sed ad breve tempus. Nam ubi primum remisit astringens Cauterii vis, sanguis eò majori pertinaciâ effluit, quò deligandæ arteriæ non amplius detur occasio. Facillè tamen concesserimus, per Cauterium, minimis saltem in vasculis, subitanam & durabilem esse sanguinis cohibitionem. Sed exinde

Cultri utilitas magis elucet; siquidem ex vulnere, per ipsum insidit, manat sanguis sufficiens quantitas, quæ prævertitur inflammatio, quæ semper, appposito Caustico, nimia consequi solet, ob id imprimis, quod sanguis nullus effluerit. Frustra quoque opposuerit aliquis dolorem esse mitiorem ex Caustico, quam ex Cultro. Illud accidit solum quibusdam in Tumoribus, Fungis forsitan quæ naturâ suâ partim sentiunt. Sed cæteris in casibus, præterquamquod non minus molesta sunt Caustica quam Ferrum, id habent insuper incommodi, quod unicâ vice, quemadmodum Culter, Tumores, maxime molis amplioris, delere non valeant. Sed multoties apponi debent, quæ quidem repetitâ appositione, dolores jam sævitâ æquales, multo diuturniores evadunt. Ad hæc frequentiore Causticorum usu, Tumores benigni in *Scirrhus*, *Scirrhi* in Cancros immutantur. Partes Caustici, cuiuscumque sit speciei, per apertas vulneris venas receptæ in sanguinem, venenatam ipsi qualitatem inducunt, *Arsenicalia* præsertim, quibus semel tantum applicatis, plurimi convulsi fato occubere. Unum postremo observabimus circa eos Tumores, qui versus radicem quasi in collum arctantur. In iis, quæ collum pertranscunt vasa exiliora sunt, crassissima verò & varicosa quæ in Tumoris molem disperguntur. His ergo apertis, difficiles oriuntur hæmorrhagia, quæ quidem, si Caustica adhibeantur, vitari nequeant: quippe cum iis, vulgò à Tumoris mole, ad radices pergendo, iteratis vicibus proceditur; at si Culter adhibeatur, statim à radicibus Tumor potest excidi.

*Ergò qui Tumores deleri debent, Ferro potius, quam Cauterio
potentia, delendi.*

DOMINI DOCTORES DISPUTATURI.

*M. Stephanus D'HUAME. M. Franciscus-Ludovicus
THOMAS D'ONGLÈS.*

*M. Carolus GEILLE DE
SAINT LEGER, Eques,
Consiliarius Medicus Re-
gis ordinarius, primi Ordini
& totius Equestris Ag-
minis, in Exercitu Medicus
primarius.*

*M. Joannes - Armandus ROUSSIN DE MONTA-
ROURG. M. Guillelmus FUMÉE.*

M. Antonius GARNIER.

*M. Natalis - Nicolaus
MALLET.*

*M. Marinus-Jacobus-Clarus
ROBERT, S. Ducis Bi-
pontini, dum viveret, Ar-
chiater, necnon à Consi-
liis & Secretis.*

*M. Jacobus - Ludovicus
ALLEAUME, Saluberrimæ
Facultatis DECANUS,
Militarium Nosocomiorum
ad Regis Exercitum, nec-
non in Insulis Americanis
nuper Medicus Regis.*

Proponebat Parisiis JOANNES THAURAUX, Claromontensis, Saluberrimæ
Facultatis Medicinæ Parisiensis Baccalaureus, A. R. S. H. 1776,
à sextâ ad meridiem.

Typis QUILLAU, Saluberrimæ Facultatis Medicinæ Typographi.